

èxtra

ARUBA

# OTRO SIMAN FUNDACION BETICO CROES LO ANALISA ULTIMO ACONTESIMENTONAN

## ORANJESTAD (APA)

Fundacion Betico Croes no a lanta riba su mes iniciativa. Ta e partido MEP a nombra e personanan y a manda Daniel Leo, q.e.p.d, Richard Eman y mr. John van der Kuyp dia 4 di december 1986 pa splica e personanan apunta pa Consejo di Partido pa forma un fundacion y traha independiente pa honra Betico su idealnan, principionan, labornan y su persona, asina Hyacintho Geerman, secretario di e fundacion ta scribi.

Jossy Mansur tabata den exterior, pero a base di su conocimiento y amistad profundo cu Betico, ela ser apunta unanimamente como presidente pa e miembronan di e fundacion.

Segun Hyacintho Geerman, otro siman ora cu tur miembro di e fundacion ta na Aruba, nan lo tene un reunion pa analisa ultimo acontecimiento. E no tabata kier a comenta nada di e carta di e yiu di Betico Croes pa cu e fundacion. Cual carta, segun e secretario, e mes no

a mira ainda.

E ta splica, cu e principio di partido MEP ta cu e fundacion mester traha independiente di e partido politico pa conserva e idealnan di Betico. Esaki tambe ta loke semper a sosode, sin kita ni pone cu Betico ta un lider politico di MEP y cu semper fundacion tabatin contacto cu e partido y famia di Betico den tur acontecimiento y actividadnan relaciona cu fundacion.

E ponencia maligno y tipico di e redactora estahero di Diario, cu kier mescla e asunto di fundacion cu politica ta leu di verdad, asina

Hyacintho Geerman a duna di conoce.

"Mi ta sigur cu Jossy Mansur sa masha bon cu ta pesey e fundacion tin su mes estatuto, pero ta e redactora aki di Diario semper ta saca informacionnan fuera di nan contexto, keriendo cu e pueblo Arubano ta bobo y ta kere tur loke e kier trose".

E secretario por bisa cu e fundacion no tin nada contra Jossy Mansur. Semper nan a traha hunto y a purba desplega loke partido MEP a pidi nan pa hasi pa honra Betico.

Cu awe Jossy Mansur tin problema cu famia di Betico,

ta algo particular y no tin nada di hasi cu otro integrantes di fundacion, te asina leu cu Hyacintho Geerman sa. E ta spera cu pronto e situacion aki por normalisa y cu personanan den conflicto por compronde otro y asina nan por sigi honra libertador Betico den tur tranquilidad.

èxtra